



UKA 2020/54

24/11-2020

Rachel Ingemann

Atuarfik pillugu inatsit atuuttup allanngortinneqarnissaanut, taamalu meeqqat atuarfianni tamani isumaginninnermut siunnersortimik imaluuniit inummik isumalluutigineqarsinnaasumik minnerpaamik ataatsimik atorfinitsisoqartarlernissaa anguniarlugu siunnersuusiornissaamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Meeqqat pisariaqartitsisut atuarfimmut tunngassuteqanngitsunik ajornartorsiutigisinnaasaminnik oqaasinngortitsinissamut, ikiorneqarnissamullu periarfissinneqarnissaat atorfinitsitsinerup qulakkiissavaa.

(Inatsisartunut ilaasortaq Nivi Olsen, Demokraterne)

(siullermeerneqarnera)

Demokraatit inatsisartunut ilaasortaatitaannut Nivi Olsennimut, siunnersummut pingaaruteqarluinnartumut qutsavigaarpot.

Pingaartorujussuuvoq, ataatsimoorluta Meeqqat atuarfiat pitsaanerpaaq pilersissallutigu, meeqqat atuarfiat ilinniartitaanermut iluatsilluartumut ingerlariaqqinnermi tunngaviliisummat. Pingaartuvvorli, fagitigut piginnaasat kisimik ukkatarineqannginnissaat – aammali meeqqat atuarfianni, inooqatigiinnermut piginnaaneqalernissaq aammalu allanik peqateqarnermut suleqatigiinnermullu piginnaasaqarnissaq. Taamaakkami Meeqqat atuarfiat ukkatarissallugu pingaartorujussuuvoq, inuaqatigiinni pitsasumik ineriartussagutta. Taamaaliussaagullumi.

Tamannamiuna tunngavigalugu Inatsisartunut ilaasortap Demokratineersup Nivi Olsenip isumassarsiatsialaa, maanna oqaluuserigippot. Atuarfinni isumassortit tassaalluinnarsinnaapput, piffisaatillugu meeqqat ajornartorsiutaannit takunnissinnaasut, taamaaliornikkut sukkasumik sunniuteqarluartumillu eqqortumik ikorsiisoqarsinnaammat meeqqanut taakkununnga. Demokraatinut tamanna pingaartorujussuuvoq. Meeqqat siunissaraagut, sapinngisarput malillugu ikiortariaqarpagut siunertaralugu, pitsaanerpaaamik inuuneqarnissaat.

Maluginiarparput, Naalakkersuisut allannguutissatut siunnersummk saqqummiisimasut. Uagulli una perusunneruarput, ataatsimiitaliap Inatsisartunut ilaasortamit Nivi Olsenimit aallaqaammut siunnersuutaasup ukkatarissagaa, Naalakkersuisulli allannguutissatut siunnersuutaanni pitsasortai takulluarsinnaavagut.

Taamatut oqaaseqaateqarluta aallaqqaammut siunnersuutaasup akuersissutigineqarnissaai innersuussutigaarput Kultureqarnermut, Ilinniartitaanermut Ilageeqarnermullu ataatsimiitaliam oqaluuserineqaqqittussanngorlugu.